

UVODNIK


Kapija, godišnjak Behram-begove medrese, izlazi 10. put. Taj mali jubilej je dobra prilika da se osvrnemo na prethodna izdanja časopisa i sumiramo teme i radove koji su obilježili tu prvu deceniju njegova izdavanja.

Kapija je ogledalo našega zajedništva i truda. Posebno smo ponosni što smo sve prethodne radove objavili u digitalnoj bazi CEEOL i tako unaprijedili pristup našim naučnim i stručnim sadržajima.

U ovom Uvodniku napraviti ćemo retrospektivu prethodnih brojeva *Kapije*. Sumirat ćemo naučne i stručne radove profesora iz islamistike, pedagogije, književnosti, sociologije i drugih naučnih disciplina, kao i primjera iz prakse, te pregled školskih uspjeha: rezultata na takmičenjima, vannastavnih aktivnosti i izdavačkih poduhvata učenika (list *Misak*).

U prethodnih 9 brojeva objavljeno je:

- 12 radova iz islamistike,
- 7 radova iz književnosti,
- 22 rada iz odgoja i obrazovanja,
- 7 radova iz sociologije,
- 18 radova iz različitih naučnih disciplina i primjeri iz prakse.



U svakom od prethodnih 9 brojeva *Kapije* predstavljeni su najznačajniji Medresini uspjesi i učešća na takmičenjima, javnim i kulturnim nastupima, ekskurzijama i stručnim putovanjima. Puno je dobrih rezultata postizano na takmičenjima koje organizira Pedagoški zavod TK, Uprava za obrazovanje i nauku Rijasetu IZ-e u Bosni i Hercegovini, sportska udruženja i organizacije i sl.

Naši učenici su u prethodnim godinama osvojili, između ostalog:

- 24 prvoplasirana, 17 drugih i 13 trećih mjesta na kantonalnim takmičenjima u organizaciji PZTK;
- 14 prvih mjesta, po 7 drugih i trećih mjesta na federalnim, državnim ili međunarodnim takmičenjima;
- 13 prvih mjesta, 12 drugih i 11 trećih mjesta na takmičenjima koje organizira Uprava za obrazovanje i nauku Rijasetu IZ-e u Bosni i Hercegovini;
- Medresa je uzastopno osvajala prvo mjesto u ukupnom plasmanu na sportskim susretima srednjoškolskih obrazovnih ustanova IZ-e u Bosni i Hercegovini od školske 2013/14. godine do danas. Pored toga, na različitim nivoima, pojedinačno ili grupno, osvojeno je preko 26 prvih mjesta, 12 drugih i 13 trećih.

I ova, kao i prethodne *Kapije*, sastoji se od dva dijela. Prvi dio donosi autorske radove naših profesora. Ove godine posebno ističemo radove iz islamistike, pedagoške prakse i aktuelnih društvenih tema. Među njima izdvajamo radove muftije tuzlanskog dr. Vahida Fazlovića *Uspostavljanje novog jezičko-stilskog i teološkopojmavnog instrumentarija – doprinosi u akaidskim radovima nastalim u prvim desetljećima XX stoljeća*, potom direktora Behram-begove medrese dr. Ahmeda Hatunića *Nasilje u porodici, njegovo sprečavanje (al-'unf al-usarī wa ma'nuhu) i obaveze lijepog suživota supružnika u fikhu Evropskog vijeća za fetve i istraživanja*, prijevod odlomka *Behaizam i jevrejske zajednice* iz knjige *Skrivena ruka – Studije o jevrejskim subverzivnim i tajnim pokretima* autora Abdu-l-Vehaba El-Mesirija, u prijevodu profesora Asmira Imamovića, *Nacionalizam i krize (masovne migracije i covid-19) u Evropskoj uniji*, autora dr. Ervina Sejdnovića, te *Germanizmi iz domena tekstilne industrije*, autorice Mebrure Selić, profesorice njemačkog jezika. Naravno, nezaobilazni



su radovi iz bosanskohercegovačke književnosti, primjera iz prakse (radiioničke nastave), te odgojno-obrazovnog rada s adolescentima.

Drugi dio *Kapije* čini redovni pregled aktivnosti Behram-begove medrese u školskoj 2023/24. godini. Učenici Behram-begove medrese su na kantonalnim takmičenjima osvojili 12 pozicija od 1. do 3. mjesta, 1. i 2. mjesto na federalnim takmičenjima, jedno 2. i tri 3. mjesta na takmičenjima srednjoškolskih ustanova Islamske zajednice u Bosni i Hercegovini. Prva tri mjesta su osvojili i na gradskim i kantonalnim sportskim takmičenjima. Također, u školskoj 2023/24. učenici Medrese su izdali 4 broja učeničkog lista „Misak“. U prethodnih 10 godina, period u kojem se publicira *Kapija* (od novembra 2013. do decembra 2024. godine) članovi žurnalističke sekcije izdali su 46 brojeva učeničkog lista *Misak* (od broja 66 do broja 112).

U okviru javne i kulturne djelatnosti škole, u ovom broju, predstavili smo i preko 130 prošlogodišnjih različitih školskih i gradskih programa, manifestacija, posjeta i drugih oblika vannastavnih aktivnosti.

Deseti jubilarni broj *Kapije* ide već dobro utabanom stazom predstavljanja Behram-begove medrese javnosti, njenog identiteta i značaja u društvu. *Kapija* na taj način snažno oslikava vrijednosti Medrese, poput vjerskog i nacionalnog identiteta, učenja i odgoja, kreativnosti i inovativnosti i njenu osnovnu svrhu – odgoj i obrazovanje učenika svjesnih tradicije i u skladu s izazovima vremena.

Zahvaljujemo se svima koi su u prethodnom periodu doprinijeli da godišnjak Behram-begove medrese redovno izlazi. Nadamo se da će već ustaljena praksa, metodologija, ali i dalja unapređenja rada, biti u agendi uredništva ovog godišnjaka i u narednom periodu.

Urednik